

nikiracukɯ 'acipi

'una kina'ucanga marangɯ cu. nipacɯvɯɯ nguani na cimɯɯ mapusan
vangata takuisi. noo matarava cu taniara ia, araɯn cu nguani mumu takuisi
mapu'a na tamia'aa. kina'ucanga isua 'akia nguani tamna manu. sii ka'anɯ
mamanɯng tamu nanakɯ tamna tina'an, 'inmamia cu tamu sarunai tɯni pa
putukio.

'una ucani cenana, musukɯmɯ tamu nanakɯ, monoon tapasavuana.
tantaniara marangɯ sarunai mukusa tapasavuana mincau 'inia. cenana mesua
kana'amisan cucuru makungu. noo matirupangɯ cu marangɯ
sarunai 'apakɯnɯ takuisi ia, matikuru cu makacɯmɯɯ tikuru, maica na 'una
ɯɯna cacanɯ. sii makungu curu, ka'anɯ tarasangai makɯɯkɯɯ.

tantaniara marangɯ marivici campe nipo'ucipia macici mumu takuisi,
mukusa na tapasavuana. "nimikia kasu nanu iavatu?" kesoniɯn tamu
nanakɯ, 'esi makɯɯkɯɯ marangɯ sarunai tamna kɯkɯ, makai 'una vakɯɯ.
ka'anɯ marangɯ sarunai tia pakaka tamu nanakɯ tamna cɯpɯngɯ. imua paira
marivari, tinipuru ku cau cucumeni tamna kuruma misee. nakai pacɯpɯngɯ
tamu nanakɯ, makasia aka tanira, tia kara 'una kuruma mucimɯɯ? mataa tia
kara tantaniara 'una kuruma?

nimoon cu na tapasavuana tamu nanakɯ ucani vuanɯ. muruvuarɯ cu
kani matai'i na tapasavuana. makari na 'iseeng tia cu ku aratɯkɯnɯ misee.
nivua 'iseeng savuana, mikarɯ cu kangkuhu tumatacucu 'inia mutanasa.
surumu 'una cau marisusuna: "'una cau takuvɯcɯnɯ kurisivatɯ!" 'esi na
ɯɯna cacanɯ 'una cau kurisivatɯ 'inia. marangɯ nguain tamna capai.
mukusa 'inia kangkuhu cumacɯ'ɯra, nguaiava sua tantaniara tumatacucu
mumu takuisi marangɯ. makacang tamu nanakɯ murungu papanapa
tikuru 'apacaruvu 'inia. cumacɯ'ɯra nipaicaa cacanɯ,
tapikupiku 'inia 'anuka 'acipi. cumacɯ'ɯra makɯɯkɯɯ sua marangɯ
sarunai. cucuru aka cɯpɯngɯ makasi: "ɯ'ɯvɯ marangɯ, sosomanpe kasua!"
marivari marangɯ sarunai: "maraini! matatɯricang cu natia imaa musu
mumu takuisi." tamu nanakɯ muru'ɯsɯ'ɯ uma'atɯpɯ marangɯ sarunai.
makasi kana'amisan isi cucuruana ma'avu cɯpɯngɯ maku, ka'anɯ tia
roimiɯn na cacanɯ 'anuka 'acipi.

腳印

有對年長的夫妻，住在山上飼養乳羊，他們按時程擠出羊奶賣到商家。老夫妻沒有小孩，老奶奶身體也不好，只有老爺爺可以工作。老奶奶生病住在醫院，老爺爺每天帶著剛煮熱的羊奶送到醫院。老奶奶已經住院一個月，要求醫生讓她出院。突然有人大喊有老人家倒臥在雪地上。護理人看到是那位每天送羊奶的老爺爺，老奶奶望著他所經過的足跡說，老伴啊！感謝你啊！老爺爺說，不好意思羊奶已經涼了。老奶奶掉著眼淚說這個冬天真是溫暖啊！